



Reorganisaziun communal

Revisiun parziala dil regulativ d'indemnisaziun

M E S S A D I

dalla suprastanza communal al cussegl da vischnaunca

Stimau signur president
Preziadas signuras cusseglieras
Preziai signurs cussegliers

1. Introducziun

Il regulativ d'indemnisaziun vertent datescha dils 22 da zercladur 2012. Pia ein gleiti 10 onns vargai dapi che quel ei vegnius adattaus la davosa gada. Il regulativ reglescha l'indemnisaziun dils commembers d'autoritads e da cumissions sco era d'ulteriurs funcziunaris.

Igl ei necessari d'adattar il regulativ als standards da lavur d'ozildi. La definiziun dil pensum da lavur total dalla suprastanza communal cun ina piazza cumpleina da 100% s'auda en nossa vischnaunca definitivamein tier il vargau.

Igl ambient da lavur ei ils davos onns semidaus e la lavur ei s'augmentada, seigi quei per la suprastanza communal sco era per las collaboraturas ed ils collaboraturs. Aschia ei la lavur en general buca vegnida pli semplia, numerusas prescripziuns (p.ex. lescha davart habitaziuns secundaras) fan la lavur magari stentusa e pli complicada.

Plinavon ei ina dallas pli impurtontas lavurs, sper quella dil mintgadi, da sviluppar vinavon nossa vischnaunca. Per saver far quei drova ei resursas persunalas. Seigi quei tier il persunal communal sco era tier la suprastanza communal. Nossa vischnaunca e nossa regiun ston daventar pli attractivas e sesviluppar vinavon. Quei sto esser ina da nossas pli aultas ed impurtontas finamiras. Tut igl auter ei stagnaziun. E star eri ei per nus negin'opziun. Nus duvrein el futur novaziuns e purschidas attractivas. Quei dumignein nus denton buca mo cun far la lavur da mintgadi. Exact quei ei in dils pli gronds mancos ellas regiuns periferas. Nus prestein biara e buna lavur, denton havein nus buca peda da sesviluppar vinavon. Precis quei ei denton essenzial per daventar megliers. Nus astgein buca spargnar el falliu liug. Ensemen cun nies commerci, culs investurs, cun il mistregn ni la gastronomia ed aunc bia auters impurtonts acturs stuein nus procurar che nossa vischnaunca sesviluppeschi vinavon e vegni pli attractiva. Ils proxims onns ein decisivs! Innovaziun e digitalisaziun ein cavazzins che nus stuein perseguitar pli intensivamein egl avegnir. Nus vulein dar gas, quei gartegia denton mo cun las resursas necessarias.

La suprastanza communal sto agir activamein, coordinar e sviluppar. Per far quei drova ei bunas ed attractivas cundiziuns generalas. La basa persunter ei il regulativ d'indemnisaziun.

2. Incaricas dalla suprastanza communal

La lavur ordinaria dil president communal e d'in commember dalla suprastanza (suprastanza communal) san ins definir suandontamein:

- Responsabladad pil departament
- Elaboraziun dalla strategia e dil plan da finanzas
- Responsabladad pil persunal communal
- Revisiun dallas leschas communalas
- Representaziuns generalas ella publicitad
- Contact culs uffecis cantunals, cun investurs e schiglioc interessents
- Stretg contact cul menader dil departament ni il cau d'uffeci
- S'informar davart las actualitads en siu departament
- Controlla dallas finanzas, responsabladad pil quen annual
- Elaboraziun dil preventiv
- Survesta e controlla dallas investiziuns
- Inziar ed accumpignar projects

- Liquidar correspondenza generala dil cantun, dalla regiun e dils vischins
- Contact persunal, telefonic ni per mail cun vischins
- Sedutas ordinarias dalla suprastanza communal (mintga 2 - 3 jamnas)
- Sепreparar sin las sedutas dalla suprastanza communal
- Preparar tractandas per las sedutas dalla suprastanza communal ensemen cun l'operativa dil departament
- Assister allas sedutas dil cussegl da vischnaunca
- Preparar tractandas pil cussegl da vischnaunca ensemen cun l'operativa dil departament
- Leger ils acts (fatschentas) dallas sedutas dils cussegls da vischnaunca
- Ulteriuras sedutas da cumissiun (gestiun, scola, baghegiar, meglieraziun, leschas, projects (CF, deponia, attractivitat dil vitg), etc.)
- Sепreparar sin las sedutas da cumissiuns
- Representaziuns anoviars resp. visetas (uniuns, cooperaziuns, societads, etc.)
- Preparar plaids ni presentaziuns
- Sviluppar vinavon la vischnaunca e scaffir pil futur cundiziuns innovativas
- ed aunc biaras autras incaricas en favur dil beinstar public.

3. Informaziuns generalas

Per evaluar la dimensiun dalla lavur d'in commember da suprastanza (dils geraus) ei vegniu menau statistica davart dallas uras prestadas durant ils emprems quater meins digl onn 2021 (schaner entochen avrel).

Igl ei resultau ch'in commember da suprastanza lavura per la vischnaunca da Mustér en media denter **6 - 9 uras per jamna**.

4. Cumparegliaziun expensas executiva

Tenor publicaziun dils quens annuals 2019 e 2020 san suandontas cefras vegnir cumparegliadas:

Vischnaunca	<i>Expensas totalas executiva</i>		<i>Indemnisaziun dall'executiva</i>	
	2019	2020	2019	2020
Mustér	197'311	187'506	155'450	153'190
<i>Tujetsch</i>	<i>190'198</i>	<i>186'797</i>	<i>150'918</i>	<i>147'429</i>
<i>Glion</i>	<i>246'415</i>	<i>276'261</i>	<i>214'409</i>	<i>219'853</i>

5. Cumparegliaziun actuala: Indemnisaziun commembers da suprastanza

Vischnaunca	Indemnisaziun per commember	commentari
Mustér	11'000	<i>incl. spesas e sedutas ordinarias</i>
<i>Tujetsch</i>	<i>11'000</i>	<i>incl. spesas, senza sedutas</i>
<i>Medel</i>	<i>16'000</i>	<i>incl. spesas e sedutas</i>
<i>Glion</i>	<i>13'000</i>	<i>incl. spesas e sedutas da suprastanza</i>

6. Cumparegliaziun actuala: Indemnisaziun president communal

Vischnaunca	Indemnisaziun/commember	commentari
Mustér	50% - 74%	<i>basa 150'000</i>
<i>Tujetsch</i>	<i>60%</i>	<i>classa da pagas 23</i>
<i>Medel</i>	<i>30%</i>	<i>classa da pagas 19</i>
<i>Glion</i>	<i>100% (80% naven 2022)</i>	<i>classa da pagas 24</i> <i>(Perioda d'uffeci 1. 120%, 2. 124%, 3. 128%)</i>

7. Ponderaziuns cumissiun preparatoria

Il regulativ d'indemnisaziun actual ei in construct fetg special. La persuna che vul surprender il presidi sa giavischar cons procents da lavur ch'ella drova. Cunquei ch'il gremi da suprastanza ei dotaus cun total 100%, ei la lavur dils geraus dependenta dalla persuna che vegn eligida el post da presidi.

La cumissiun preparatoria ei dil meini ch'ei drova claras indicaziuns, seigi quei pil presidi ni pil post da geraus sco era pils ulteriurs uffecis. La lavur dallas persunas ch'ei promptas da surprender in uffeci duei vegnir indemnisada adequat a lur incumbensa e responsabladad. La lavur ei numnadamein pretensiusa e la responsabladad gronda.

Plinavon demuossa ei adina puspei danovamein ch'igl ei grev d'anflar persunas che sorprendan tals posts da responsabladad. Ulteriuramein pretenda l'incarica dils differents uffecis era d'unfrir entgin temps liber. Cun l'adattaziun dil regulativ d'indemnisaziun mussein nus che nus apprezziein la gronda lavur che vegn prestada di per di.

Plinavon eisi impurtont ch'ins sligia el regulativ la substituziun dil president communal el cass d'ina assenza pli liunga. Quella responsabladad eisi medemamein d'indemnisar adequat.

Sinopsa - cumparegliaziun ordinaziun existenta/revisiun parziala

Regulativ existenta	Revisiun parziala	Commentari	Cumissiu preparatoria
<p>Art. 3 Fixum</p> <p>¹ Cun il pagament d'in fixum ein tuttas uras per l'obligaziun da presenza, per la direcziun e l'administraziun dils departaments, sco la preparaziun da sedutas, il studi dallas documentaziun per las sedutas, telefonats ed uatgas entochen in'ura cumpri.</p> <p>President dil cussegl da vischnaunca frs. 1'200.—</p> <p>President dil cussegl da scola frs. 2'500.—</p> <p>President dalla cumissiu da gestiun frs. 500.—</p>	<p>Art. 3 Fixum</p> <p>¹ Cun il pagament d'in fixum ein tuttas uras per l'obligaziun da presenza, per la direcziun e l'administraziun dils departaments, sco la preparaziun da sedutas, il studi dallas documentaziun per las sedutas, telefonats ed uatgas entochen in'ura cumpri.</p> <p>President dil cussegl da vischnaunca frs. 1'500.--</p> <p>President dil cussegl da scola frs. 2'500.--</p> <p>President dalla cumissiu da gestiun frs. 1'000.—</p>	<p><i>Il president dil cussegl da vischnaunca ha cun la preparaziun dallas sedutas dil cussegl e dil biro dil cussegl da vischnaunca sco era cun il stretg contact cun il president communal in tschuat d'incumbensas. Plinavon porta el la responsabladad da tgamunar las sedutas dil parlament.</i></p> <p><i>Il president dalla cumissiu da gestiun porta en sia funcziun medemamein gronda responsabladad. Plinavon pretenda sia incumbensa da preparar las sedutas dalla cumissiu ed il stretg contact cun il president communal ed il canzlist in surpli da lavur.</i></p>	
<p>² La lavur dall'entira suprastanza communal vegn indemnizada cun la summa annuala da brutto maximalmeins frs. 150'000.--, corrispundent ad ina piazza da lavur cumpleina. Quella summa vegn repartida sin ils commembers dalla suprastanza communal tenor il temps d'engaschament.</p>	<p>² La lavur dall'entira suprastanza communal vegn indemnizada cun la summa annuala da brutto maximalmeins frs. 150'000.--, corrispundent ad ina piazza da lavur cumpleina. Quella summa vegn repartida sin ils commembers dalla suprastanza communal tenor il temps d'engaschament.</p> <p>² (niev) La lavur dalla suprastanza communal vegn calculada sco suonda:</p> <p>President communal: max. 80%</p> <p>Commember da suprastanza: 6 - 9 uras per jamna</p>	<p><i>Niev vegn la lavur dalla suprastanza buca pli dotada cun maximalmeins 150'000.--. Ina indemnizaziun fixa da 150'000.— ei memia static ed oz era buca pli pusseivel dad applicar endretg (p.ex. 74% president / suprastanza 26%).</i></p> <p><i>Daniev vegn il post dil president communal definius cun max. 80%. Ils commembers da suprastanza han da quintar cun in engaschi ordinari denter 6-9 uras per jamna.</i></p>	<p>(cumissiu e suprastanza unanim, plidadra: Theres Burri Gadola)</p> <p>² (niev) La lavur dalla suprastanza communal vegn calculada sco suonda:</p> <p>President communal: max. 80%</p> <p>Commember da suprastanza: 6 — 9 uras per jamna en media in di da lavur per jamna</p>
<p>³ Il temps d'engaschament dil president communal munta a minimal 50% ed a maximal 74% d'ina piazza cumpleina. Il temps dil engaschament vegn fixaus en entelgientscha cun la cumissiu da gestiun.</p>	<p>³ Il temps d'engaschament dil president communal munta a minimal 50% ed a maximal 74% d'ina piazza cumpleina. Il temps dil engaschament vegn fixaus en entelgientscha cun la cumissiu da gestiun.</p> <p>³ (niev) Il temps d'engaschament dil president communal munta ad 80%. Quel sa variar denter minimal 50% e maximal 80% e vegn fixaus en entelgientscha cun la suprastanza communal. El cass d'in engaschament da 60% ni sut ha il president communal la pusseivladad d'engaschar in secretariat per maximalmeins 30%. Il plaz da lavur dil president communal sco era d'in eventual secretariat ei en casa communal.</p>	<p><i>Il temps dil president communal vegn fixaus cun maximal 80% (augment da 6%) e minimal 50%. El cass d'in pensum da 60% ni sut sa vegnir engaschau in secretariat per max. 30%. Aschia resta il post da president el futur flexibels.</i></p> <p><i>Per buca « mo » ademplir la lavur da mintgadi, mobein cunzun promover e svilupper vinavon la vischnaunca da Mustér duei igl engaschament dil presidi communal niev muntar ad 80%. Igl ei en emprema lingia il president communal e la suprastanza communal che procuran per ulterius svilup e novaziuns ni per attractivas kundiziuns generalas. Persuenter drova ei resursas, era tier il president communal.</i></p>	<p>(cumissiu unanim, plidadra: Theres Burri Gadola)</p> <p>³ (niev) Il temps d'engaschament dil president communal munta ad 80%. Quel sa variar denter minimal 50% e maximal 80% e vegn fixaus en entelgientscha cun la suprastanza communal. El cass d'in engaschament da 60% ni sut 80% ha il president communal la pusseivladad d'engaschar in secretariat per maximalmeins 30% proporziunal alla reduziun dil pensum dil president. Il plaz da lavur dil president communal sco era d'in eventual secretariat ei en casa communal.</p>

<p>⁴ Igl engaschament fundamental dils ulteriurs suprastonts munta a 26%. Mintgin vegn indemnissaus cun la summa annuala da frs. 9'750.--</p>	<p>4 Igl engaschament fundamental dils ulteriurs suprastonts munta a 26%. Mintgin vegn indemnissaus cun la summa annuala da frs. 9'750.--</p> <p>4 (niev) Il president communal vegn indemnissaus tenor la classa 23, scalem 14 dalla scala dallas pagas dil cantun Grischun resp. dalla vischnaunca da Mustér. Annualmein vegn il fixum adattaus cun in alzament d'in scalem tenor scala da pagas dalla vischnaunca da Mustér entochen al scalem maximal dalla classa 23 (duas periodas d'uffeci). In eventual secretariat vegn indemnissaus tenor engaschament da persunal ordinari.</p>	<p><i>La paga dil president duei el futur buca pli esser statica. L'experientscha e la savida prendan tier onn per onn. Aschia duei era la paga dil president communal esser variabla. Cun la fixaziun dalla classa e dil scalem vegn la lavur dil president communal indemnissada adequatamein.</i></p> <p><i>Cun la revisiun dil regulativ (scalem e scala) vegn il president communal en cumparegliaziun cun il regulativ vertent proporziunalmein schizun a survegnir pli pauc paga che entochen dacheu. Quella disfavur duei vegnir cumpensada cun in lev augment annual. Sco quei ch'igl ei ell'economia privata vegn l'experientscha e la savida onn per onn pli gronda ed indemnissada corrispudentamein. Plinavon vegn fatg cuors e tut tenor era sescolau vinavon. Sil pli tard suenter otg onns (duas periodas d'uffeci) vegn l'indemnisaziun buca pli adattada cun in alzament annual (scalem final dalla classa 23).</i></p>	
<p>⁵ La quota variabla dil president communal da 24% sa gest tenor las relaziuns persunalas, la disponibilitad e la pusseivladad d'engaschaments supplementars vegnir repartida sin ils ulteriurs commembers dalla suprastanza communal, quei sin fundament d'ina proposta dil president communal e d'ina clara circumscripziun dallas incaricas e cun il consentiment dalla cumissiun da gestiun.</p>	<p>⁵ La quota variabla dil president communal da 24% sa gest tenor las relaziuns persunalas, la disponibilitad e la pusseivladad d'engaschaments supplementars vegnir repartida sin ils ulteriurs commembers dalla suprastanza communal, quei sin fundament d'ina proposta dil president communal e d'ina clara circumscripziun dallas incaricas e cun il consentiment dalla cumissiun da gestiun.</p> <p>⁵ (niev) Il vicepresidente survegn per sia funcziun ina indemnisaziun supplementara annuala da 2'500.--. El cass ch'in remplazzament urgent dil president communal cuoza pli ditg che 30 dis senza interrupziun ha il vicepresidente dabien proporziunalmein la medema indemnisaziun sco il president communal.</p>	<p><i>Il vicepresidente ha in'impurtanta funcziun. El representa la vischnaunca anoviars el cass ch'il president communal ei inagada impediuss ni sa buca prender part ad ina u l'autra occurrenza. Plinavon ei el responsabels pils fatgs communsals durant il temps da vacanzas ni schiglioc absenzas. Quella lavur ei in fatg ed ei entochen oz buca vegnida indemnissada.</i></p> <p><i>Plinavon vegn il cass reglous ch'il president curdass inagada ora pli ditg ni prendess in sabatical (congedi) pli liung.</i></p>	
<p>⁶ El fixum dalla suprastanza communal e dil president communal ei l'indemnisaziun per tutta lavur ordinaria (inclusiv sedutas da suprastanza e dil cussegl da vischnaunca) enteifer igl intschess dalla Surselva cuntenida.</p>	<p>6 El fixum dalla suprastanza communal e dil president communal ei l'indemnisaziun per tutta lavur ordinaria (inclusiv sedutas da suprastanza e dil cussegl da vischnaunca) enteifer igl intschess dalla Surselva cuntenida.</p> <p>⁶ (niev) Igl engaschament fundamental dils ulteriurs suprastonts vegn calculaus denter 6-9 uras per jamna. Mintga commember da suprastanza vegn indemnissaus per quei engaschi cun la summa annuala da frs. 14'000.--. Mintga perioda d'uffeci ch'in commember da suprastanza aschunta vegn indemnissada cun in augment da 4%.</p>	<p><i>Il post en suprastanza duei el futur vegnir definius en procent. Aschia sa ina persuna che vul candidar cun con engaschi ch'el sto schi circa quintar. La lavur d'in suprastont sa tenor fatschenta variar fetg. Aschia eisi bein pusseivel ch'el sto era impunder privat (preparar fatschentas, s'informar, representaziuns, projects) entgin temps dapli. Intragliauter duess ei el futur denton tonscher cun impunder max. in di ad jamna.</i></p> <p><i>Uteriurs posts ella funcziun sco suprastont (p.ex. sedutas uffeci da baghegiar, sedutas en cumissiuns etc.) vegnan indemnissadas separadamein. Cun ina pauschala da frs. 14'000.-- ella funcziun da 15% vegnan ils commembers da suprastanza indemnissadas</i></p>	<p>(cumissiun e suprastanza unanim, plidadra: Theres Burri Gadola)</p> <p>⁶ (niev) Igl engaschament fundamental dils ulteriurs suprastonts vegn calculaus denter 6-9 uras en media cun in di da lavur per jamna. Mintga commember da suprastanza vegn indemnissaus per quei engaschi cun la summa annuala da frs. 14'000.--. Mintga perioda d'uffeci ch'in commember da suprastanza aschunta vegn indemnissada cun in augment da 4%.</p>

		<p><i>adequatamein ed en cumparegliaziun cun autras vischnauncas en in rom corrispudent.</i></p> <p><i>En quell'alineia vegn definiu pli clar tgei ch'ei exact cumpriu el fixum dalla suprastanza communal. Ulteriuras sedutas vegnan indemnissadas tenor regulativ art. 6.</i></p> <p><i>L'experientscha d'in commember da suprastanza prentier cun ils onns, aschia che la vischnaunca profitescha sche la perioda d'uffeci d'in commember da suprastanza cuoza pli ditg che mo ina. Quell'experientscha ed enconuschientscha dallas lavurs duei cun mintga perioda d'uffeci vegnir indemnissada cun in lev augment.</i></p>	
	<p>7 (niev) El fixum dalla suprastanza communal e dil president communal ei l'indemnisaziun per tuttas sedutas ordinarias dalla suprastanza e dil cussegl da vischnaunca cuntenida.</p>		
<p>⁷ Quels fixums vegnan adattai alla carischia conform alla reglamentaziun cantunala.</p>	<p>⁸ Quels fixums vegnan adattai alla carischia conform alla reglamentaziun cantunala.</p>	<p><i>Sulettamein midau nr. dall'alineia.</i></p>	
<p>⁸ Tuttas indemnisaziuns per mandats ufficials en num dalla vischnaunca van en cassa communal.</p>	<p>⁹ Tuttas indemnisaziuns per mandats ufficials en num dalla vischnaunca van en cassa communal.</p>	<p><i>Sulettamein midau nr. dall'alineia.</i></p>	

Proposta

Sin fundament dallas ponderaziun suramenziunadas

propo na

la suprastonza communal a Disentis/Mustér da vischnaunca d'approbar la revisiun parziala dil regulativ d'indemnisaziun.

Suprastonza communal Disentis/Mustér
Il president: Il canzlist:

René Epp

Andri Hendry

Disentis/Mustér, ils 18 d'october 2021

- Regulativ d'indemnisaziun